

Leeter masa Pawl ma wuzlalatar a Efez hay

Mey da ray

Leeter ngada Efez hay

Leeter e keɗe na, ara Pawl ma wuzlalatar a ngada ndəhay daa mecəmey-ray nga Yesu daa berney nga Efez, asaya ngada ndəhay daa mecəmey-ray hay mekele mekele nga Yesu daa berney hay gweegwe ta Efez e. Pawl a wuzlala leeter e na, daa masa aŋga daa fərsəne. A kəzlamara aa fərsəne he na, maja aŋga ma wuzey Mey-maaya-mawiya. Ma handa leeter e a Efez na, ara Tisik (6.21).

Pawl a sərta ndəhay mekele mekele daa mecəmey-ray nga Yesu da Efez na, maja ta wuzey mey nga Gazlavay la fetede mevey maakar (SNM 19-20).

Mey mahura masa daa leeter keɗe na, ara cek masa Gazlavay ma wudey nga ka ha (1.10). «Cek masa aa ma wudey nga ka ha na, ara mecəmey ray nga cek hay da gazlavay da vad ta cek hay da bəla tabiya asi har nga Bay pal, Kəriste.» Cek masa aa ma wudey nga ka ha, a da key na, ta fa mecəmey-ray nga ndəhay nga Yesu.

Daa leeter keɗe na, Pawl aa guzley da ray Gazlavay ma wudta ndəhay kalah (1-2.10). Fa dəba ha, aa guzley da ray Jəwif hay ta Jəwif hay ba hay ma təram nga səkway pal ta fa Kəriste (2.11-3.13). Pawl a kətata Efez hay amba a njam

maaya maaya, a tɔbmara mey nga Yesu ma fɔna ma fɔna, a njam anda ata ma njam zleezle saba (fasɔlawal 4 haa 6).

Daa leeter e keɔe na, mey mekele mekele daha nga vɔley gɔɔaŋ a ndɔhay:

Gazlavay ta kandakwar maaya la ta fa Yesu Kɔriste (fasɔlawal 1 haa 2)

Si zel hay a wudmata ngwas ata hay, ngusay a namatar ray a zel ata hay (5.22-33)

Mey da ray ma key vɔram ta bay-malula (6.10-20)

Mecey-har nga Pawl a Efez hay

¹ Ara yah, Pawl, ma wuzlalakwara leeter keɔe, yah ndaw masa *Gazlavay ma wala nga key *ndaw-meslɔrey nga *Yesu *Kɔriste.

Leeter keɔe ara ngada akwar, ndɔhay nga Gazlavay daa berney nga Efez, akwar macɔmkaya ta Yesu Kɔriste, asaya, akwar ma tɔbmara mey aŋga ta mevel pal.

² Anja Papa alɔkwa, Bay Gazlavay, ta Bay alɔkwa Mahura Yesu Kɔriste nga pɔsmakwar mey, asaya nga njadamakwar daa zazay.

Cek hay maaya masa Gazlavay ma vɔldatara a ndɔhay ta fa Yesu Kɔriste

³ Hɔlmakwa Gazlavay, Papan nga Bay alɔkwa Mahura Yesu *Kɔriste. Mepɔsey-mey aŋga kwa wura wura ma sawa ta da vad, aa da ray alɔkwa. Ya hɔtkwa mepɔsey-mey a na, maja alɔkwa macɔmkaya ta Kɔriste.

⁴ Sərfadamara, dəga Gazlavay ta ləma bəla daa ba aran na, ta walandakwar sem nga cəmey ta Kəriste, amba ya tərkwə ndəhay maaya fa mey anğa, ndəhay masa ta mebərey ba. Gazlavay a wudndakwar kalah,

⁵ maja ngenə, ta walandakwar sem dəga zleezle nga tərey bəz anğa hay ta fa Yesu Kəriste. Gazlavay a ka kəne na, maja ta mbafar la, a wufey nga ka kəne.

⁶ Da ray ngenə, həlmakwa Gazlavay maja aa ma wudndakwar kalah. A wuzdərwa mewufey-vaw a na, ta fa sləra masa Bəzey anğa mawudkaya kalah ma ka nğada aləkwa.

⁷ Maja aləkwa macəmkaya ta Kəriste na, Gazlavay ta ləhdandakurwa sem dasi har nga bay-malula, asaya, ta mbəkdandakwara mebərey sem ta fa mambaz nga Yesu ma mbədfwa daa meməcey anğa. Anda kedə, Gazlavay a wuzdandakwara mesərey dey-ceceh anğa ta mewufey-vaw anğa ha na, aa ga kalah nğada aləkwa.

⁸ Ta kandakwar maaya la ga kalah, ta vəlndakwar lenğesl maaya la,

⁹ ta wuzdandakwara cek masa mabadakaya dəga zleezle sem, anda meləvey, cek masa aa ma wufey nga ka ta fa Kəriste.

¹⁰ Ta pas masa đar a ta wuswa cay na, a da ndəvda cek masa aa ma wufey nga ka ha. Cek masa aa ma wufey nga ka ha na, ara nğə cəmtar

1:4 1.4 5.27; Jan 15.16; 17.24; 2Tes 2.13 **1:5** 1.5 Jan 1.12 **1:6** 1.6 Mt 3.17; Rm 5.2; Kwa 1.13 **1:7** 1.7 meləhey dasi har nga bay-malula: Kwa 1.13-14; **mambaz:** Ef 2.13; Rm 3.25-26; Kwa 1.20; 1Jn 5.7; **mewufey-vaw anğa ga kalah:** Ef 2.7 **1:9** 1.9-10 1.22; Kwa 1.16, 20

ray a cek hay da gazlavay da vad ta cek hay da bēla tabiya asi har ŋga Bay pal, Kōriste.

¹¹ Gazlavay ta wudēy sem amba cek hay tabiya a kam maaya maaya anda aŋga ma wudēy ŋga ka. Ta wudēy sem dēga zleezle ŋga walandar ala *Jōwif hay wal amba ya tēram ndōhay aŋga hay macēmƙaya ta Kōriste.

¹² Da ray ŋgene, ala ndōhay masa ŋgeeme ma pamara Kōriste ŋga ndaw ala fara fara na, ala fa hōlmamara Bay Gazlavay maja maaya aŋga kalah.

¹³ Akwar ndōhay masa Jōwif hay ba hay may, akwar ta cōdamara *Mey-maaya-mawiya la. Ara mey maaya fara fara ma lōhdakwar maja akwar ma pamara Kōriste ŋga ndaw akwar fara fara. Maja ŋgene, Gazlavay ta vōlkwar Mesōfney aŋga la a ray akwar anda aa ma lōvey zleezle a da vōldatara a ndōhay aŋga hay. Mesōfney a na, ara anda cek matōhkaya fa dangay ŋga sōrey akwar na, ndōhay aŋga hay.

¹⁴ Maja alōkwa ma hōtkwa *Mesōfney ŋga Gazlavay na, ya sōrkwa fara fara Gazlavay a da vōldandakwara cek hay maaya tabiya masa aŋga ma lōvey a da vōldatara a ndōhay aŋga hay heyey. Ya da hōtkwa cek hay a na, daa masa alōkwa ta lōhkwa cay daa cek hay maaya ba da bēla keƊe *. Anda keƊe, hōlmakwa Bay Gazlavay maja aa ta gōdaŋ.

1:11 1.11 1.4; Rm 8.28-29 **1:13 1.13** 4.30; 2Kwr 1.22; Kwa 1.5

* **1:14 1.14** Ya da hōtkwa cek hay maaya tabiya masa Gazlavay ma lōvey a da vōldandakwara na, ta pas masa Bay Mahura Yesu ma da vōhwa a bēla (Rm 8.23). **1:14 1.14** 4.30; 2Kwr 1.22

Pawl a kar suse a Gazlavay daa medərey-dangay

¹⁵ Anda kefe, dəga yah ma cənda akwar fa təbmara mey nga Bay aləkwa Mahura Yesu, ta akwar fa wudmata ndəhay nga Gazlavay cəpa na,

¹⁶ ya fa key suse a Gazlavay maja akwar mandaw mandaw. Daa masa ya fa dərey dangay a Gazlavay na, ya fa sərfadakwar.

¹⁷ Ya fa dərey dangay a Gazlavay nga Bay aləkwa Mahura Yesu *Kəriste. Gazlavay a, ara Papaŋ ta gədaŋ. Yaa cəfda amba a vəkwar lenjesl, a wuzdakwara ray anga amba ka sərmara maaya maaya.

¹⁸ Asaya, ya faa cəfda Gazlavay amba a pa mewedey anga aa mevel akwar, amba ka sərmara cek hay maaya kalah masa aa ma da vəldakwara. Da ray ngene, cek hay maaya kalah ha na, akwar fa səkwmarə maja ka sərmara ka hətam la fara fara. Ka hətam la fara fara, maja Gazlavay a zəkwar nga tərey bəz anga hay. Ya faa cəfda saya amba ka sərmara mepəsey-mey anga masa maaya ara mey ba, masa aa ma diya amba a vəldatara a ndəhay anga hay.

¹⁹ Asaya, ya faa cəfda Gazlavay amba ka sərmara gədaŋ anga ma jəndakwar, aləkwa ndəhay ma təba mey nga Yesu. Gədaŋ anga ha na, a fənta gədaŋ hay nga cek hay tabiya.

²⁰ Ara gədaŋ masa ma sləkɖadərwa Kəriste daa meməcey. Ara gədaŋ a saya ma təpda

Køriste he a vadŋga njeŋaa slam maaya ta har-zəmay ŋga Gazlavay.

²¹ Fetede, Køriste he fa wey da ray mesəfney hay maaya ta maaya ba hay tabiya masa ma wam da ray cek hay tabiya da vadŋta da bəla. Gədanŋga Yesu na, a fənta gədanŋga bay hay tabiya ma wam wure kede da bəla ta ŋga bay hay tabiya ma da wam ŋgada fa mey.

²² Ahaw, Gazlavay ta pata cek hay tabiya sem asi har ŋga Køriste. Asaya a pa Køriste ŋga *bay-ray ŋga mecəmey-ray ŋga ndəhay anŋa hay.

²³ Yaw, mecəmey-ray ŋga ndəhay anŋa hay na, ara anda vaw anŋa. Køriste fa wuzwa vaw a ndəhay tabiya da bəla. A wuzwa vaw na, ta fa mecəmey-ray ŋga ndəhay anŋa hay a. Ara anŋa ma vəltar heter a cek hay tabiya kwa daa wura daa wura cəpa.

2

Gazlavay a vəldakwar heter na, ta fa Yesu

¹ Zleezle masa akwar ta təbmara mey ŋga *Køriste daa ba aranŋa, akwar anda ndəhay maməctakaya, maja akwar ta mebərey, akwar fa kam cek hay malamba.

1:20 1.20 SNM 2.33; Kwa 3.1 **1:21 1.21** 6.12; Rm 8.38; Gal 4.8-9; Kwa 1.13, 16, 20; 2.9-10, 15, 20 **1:22 1.22** 1.10; 4.15; 5.23; Ps 8.7; Kwa 1.18; 2.19 **1:23 1.23** mecəmey-ray ŋga ndəhay ŋga Yesu ara anda vaw anŋa: 2.16; 4.1-16, 25; 5.30; 1Kwr 12.4-11, 27; Kwa 2.19; **Køriste aa daa mecəmey-ray ŋga ndəhay anŋa hay:** 2.14, 18; 4.1-6; Kwa 3.15; **Gazlavay a njeŋaa ta ndəhay anŋa hay:** 3.19; 4.10 **2:1 2.1** 2.5

² Daa ηgene, menjey akwar na, maaya ba, anda ndəhay da bəla kefe ma sərmara Gazlavay ba. Akwar fa təbmara mey ηga *Satan, bay-malula, ma wey da ray mesəfney maaya ba hay ma pəkam daa memed da bəla. Bay-malula ha na, aηga fa wata ndəhay ma rəsmara mey ηga Gazlavay haa wure kefe.

³ Daa masa aləkwa ma təbkwa mey ηga Kəriste daa ba araη na, aləkwa kəne may, maja daa ηgene na, ya kakwa cek hay maaya ba tabiya anda mevel aləkwa ma wudəy. Aləkwa fa kakwa cek hay tabiya anda lenɡesl aləkwa ta vaw aləkwa ma wudəy. Maja cek hay maaya ba hay a na, Gazlavay a da ce y mevel ga a ray aləkwa anda aa ma ce y mevel a ray ndəhay siya may.

⁴ Ama Gazlavay na, ara ndaw ma sərey dey-ceceh fa ndaw. Ta wudndakwar la ga kalah.

⁵ Da ray ηgene, kwa daa masa aləkwa anda ndəhay maməctakaya maja mebərey aləkwa na, Gazlavay ta cəmdakwar la ta Kəriste, ta vəlndakwar heter mawiya la. Sərfadamara, ara ta fa maaya ηga Gazlavay a, akwar ma ləham daa mebərey.

⁶ Gazlavay ta sləkɗadandakurwa sem daa meməcey daa slam a ta Yesu Kəriste na, maja aləkwa macəmkaya ta Kəriste he. Asaya, ta njadandakwar sem daa slam a ta aηga da gazlavay a vad ηga wey da ray cek hay tabiya.

2:2 **2.2** 6.12; Jan 12.31; 14.30; SNM 26.18; 1Jη 2.16 **2:3** **2.3** 5.6, 8; Rm 1.28; Kwa 3.6 **2:4** **2.4** Rm 8.39; 9.16; Jak 5.11 **2:5** **2.5** 2.8; Rm 3.24; 6.13; Kwa 2.12-13 **2:6** **2.6** 1.3; Kwa 2.12; 3.1

⁷ A wuzdərwa maaya anğa nğada aləkwa ta fa Yesu Kəriste anda kede na, amba a wuzdatara a ndəhay nğada fa mey, mesərey dey-ceceh anğa ta mewudəy-vaw anğa ha na, anğa ga kalah.

⁸ Yaw, ara ta fa maaya anğa ha Gazlavay ma ləhdakwar daa mebərey maja akwar ma təbmara mey nğa Yesu. Akwar ma ləham a na, ara ta gədan akwar ba, ama ara Gazlavay ma vəldakwara gədan nğa ləhey a.

⁹ Gazlavay ma ləhdakwar na, ara maja sləra akwar maaya masa akwar ma kamara ba. Anda kede, ka da zlapam maja ba.

¹⁰ Yaw, ara Gazlavay ma ka amba ya cəmkwa ta Yesu Kəriste. Da ray nğene, Gazlavay ta vəlndakwar heter mawiya la amba ya kakwa sləra hay masa maaya kalah. Sləra hay masa maaya hay a na, Gazlavay ta diyndakwara cay amba ya kakwa.

Jəwif hay ta Jəwif hay ba hay macəmkaya pal ta fa Yesu Kəriste

¹¹ Da ray nğene, wulkam, zleezle akwar na, kwara? Akwar ta yamawa daa səkway nğa *Jəwif hay daa ba. Jəwif hay a, a zəlmakwar na, ndəhay manda-sla mandawal hay. Ata na, a ləvam ata ndəhay maslatakaya mandawal. Ama *mesley mandawal na, ara cek masa ndəhay ma kamara fa vaw ata hay gway.

2:7 2.7 1.7; Rm 5.20 **2:8 2.8** Mt 20.15; Janj 4.10; SNM 15.11; Gal 2.16 **2:9 2.9** Rm 3.28; 1Kwr 1.31; 2Tm 1.9; Tit 3.5 **2:10 2.10** Tit 2.14 **2:11 2.11** 5.8; **mesley mandawal:** Gal 5.6; Fəl 3.3 **2:11 2.11-13** Rm 11.17

¹² Ahaw, daa ṅgene na, akwar dōrenj ta *Kōriste, *ndaw masa Gazlavay ma wala ṅga lōhdata ndōhay. Akwar na, ndōhay daa sōkway ṅga *Israyel hay ba, akwar mōlak hay. Akwar daa *mejōwey-mey ṅga Gazlavay ta Israyel hay daa ba. Daa mejōwey-mey a, Gazlavay a lōvtar a da njeý ta ata ṅga mandaw mandaw. Akwar manjatakaya da bōla, Gazlavay aa ta akwar daa ba, ka njam na, ṅga ray akwar gway.

¹³ Ama akwar masa dōrenj ta Gazlavay heyey na, wure keḁe, akwar macōmkaya ta Yesu Kōriste. Gazlavay ta ṅgōchadakurwa la a cakay a, ta fa mambaz ṅga Kōriste ma mbōḁwa daa memōcey aṅga.

¹⁴ Fara fara, ara Kōriste ta ray aṅga ma handōrwa zazay a wuzlah alōkwa. A handōrwa zazay a daa masa aṅga ma cōmtar ḁay a ndōhay Jōwif hay ta ndōhay Jōwif hay ba hay, ṅga key sōkway pal. Zleezle na, ndōhay Jōwif hay ta ndōhay Jōwif hay ba hay a ṅgōlam vaw ba. Mēngōley-vaw ata ba ṅgene na, ta tōrey sem anda zlēṅger da wuzlah ata ma wunkata. Anda keḁe, ta fa memōcey ṅga Yesu na, zlēṅger e, ta pōlhey sem.

¹⁵ *Kwakwas ṅga Mawiz na, mewey hay ga da hwaḁ a daha. Ama Kōriste ta ṅgōchada kwakwas a sem ta cakay, amba a cōmtar ḁay ṅga ndōhay Jōwif hay ta ndōhay Jōwif hay ba

2:12 2.12 Rm 9.4; 1Kwr 15.19; Kwa 1.21-22; 1Tes 4.13; **Gazlavay aa ta akwar ba:** 2.19 **2:13 2.13** akwar masa dōrenj ta Gazlavay: 2.17; 3.6; **mambaz:** 1.7; Gal 1.4 **2:14 2.14** zazay: 2.16; 4.3; Kwa 1.20; **alōkwa sōkway pal maja Yesu:** 1.23; Rm 10.12; 1Kwr 12.13; Gal 3.28

hay nga terey səkway pal macəmkaya ta anga. Ara maja ngene, zazay daha da wuzlah səkway hay cew e.

¹⁶ Ta fa meməcey anga fa hwadam ma-zanḡalakaya na, Kəriste ta vavəsa menḡəley-vaw ba da wuzlah səkway hay cew keḡe heyey sem nga terey səkway pal. Anda keḡe, ta fa meməcey anga ha na, ta cəmtar ḡay cay ta Gazlavay.

¹⁷ Kəriste a sawa na, nga wuzey *Mey-maaya-mawiya ma handawa zazay nḡada akwar Jəwif hay ba hay ma səmra Gazlavay ba zleezle, ta nḡada ala Jəwif hay masa ma səmra Gazlavay.

¹⁸ Yaw, ara ta fa Kəriste he aləkwa cəpa ma hət kwa cəved nḡa daw a cakay Gazlavay, Papan, ta fa ḡəḡan nḡa Mesəfney anga pal.

¹⁹ Anda keḡe, akwar ndəhay masa Jəwif hay ba hay na, akwar mələk hay saba, akwar maslah hay saba. Ama wure keḡe na, akwar səkway pal ta ndəhay nḡa Gazlavay, akwar ndəhay daa vəḡed nḡa way pal ta ndəhay nḡa Gazlavay.

²⁰ Akwar na, anda anḡwa hay ma ḡəzla way. Salay nḡa way a na, ara ndəhay meslərey nḡa Yesu ta ndəhay ma təla mey nḡa Gazlavay. Yesu Kəriste ta ray anga na, ara anḡwa mahura ma vələr ḡəḡan a way a.

²¹ Ara ta fa Yesu Kəriste he, way a ma nje y maaya maaya ta ḡəḡan, a səkey, a key mahura

2:15 2.15 2Kwr 5.17; Kwa 2.14 **2:16 2.16** 1.23; Rm 5.10; Kwa 1.20-22 **2:17 2.17** Iz 57.18-19; SNM 2.39 **2:18 2.18** 3.12; Rm 5.2 **2:19 2.19** 2.12; 3.6; Heb 12.22-23 **2:20 2.20** Mt 16.18; 1Kwr 3.10-11; CWJ 21.14

amba way a, a terey way nga Bay Gazlavay.

²² Maja akwar macemkaya ta Kəriste na, Kəriste he ta cemkwar la ta ndəhay anga hay mekele amba akwar may, ka təram anda way a. Ara way masa Gazlavay ma njeɣ da hwad a ta fa Mesəfney anga.

3

Pawl a wuzey Mey-maaya-mawiya ngada ndəhay Jəwif hay ba hay

¹ Ara maja ngene, yah Pawl, ya fa dorey dangay maja akwar mandaw mandaw. Yah daa fərsəne maja sləra nga Yesu *Kəriste, masa yah ma ka ngada akwar *Jəwif hay ba hay.

² Akwar ma cəndamara mey da ray sləra masa Gazlavay ma vəldiwa nga key maja akwar la, ba diya? A vəldiwa sləra ha na, maja maaya anga.

³ Gazlavay ta wuzdiwa mey masa mabadakaya dəga zleezle sem amba ya səra mey a. Yaw, daa leeter keɣe na, ya taa guzlkwar la nekəɣey da ray mey mabadakaya ha.

⁴ Masa akwar fa janɣamara leeter he na, ka səmara la, yah na, ya səra mey masa mabadakaya da ray Kəriste maaya maaya.

⁵ Zleezle na, Gazlavay ta wuzdatara mey mabadakaya ha a ndəhay daa ba. Ama wure keɣe, ta wuzdatara la ta fa Mesəfney anga ngada ndəhay masa aa ma walata wal nga terey

2:21 2.21 1Kwr 3.16 **2:22 2.22** 1Pi 2.5 **3:1 3.1** fərsəne: 4.1;
 Fəl 1.7; Kwa 4.18; Flm 1, 9 **3:1 3.1-3** Kwa 1.25 **3:3 3.3** 3.6
3:4 3.4 Rm 16.24; 2Kwr 11.6

ndəhay meslərey ɲga Yesu ta ɲga tərey ndəhay ma təla mey aɲga hay.

⁶ Ehe, mey mabadakaya ha na, a ləvey Jəwif hay ba hay na, a hətam cek hay maaya masa Gazlavay ma diytara ɲgada ndəhay aɲga hay la letək ta ndəhay Jəwif hay. Jəwif hay ba hay ta Jəwif hay na, ta təram sem anda vaw pal ta fa Kəriste. Asaya, cek masa Gazlavay ma ləvey a da vəldatara a ndəhay aɲga hay na, ndəhay Jəwif hay ba hay a da hətam letək anda ndəhay Jəwif hay may. A hətam cek hay maaya kefe na, maja ata ma təbmarə *Mey-maaya-mawiya, asaya, maja ata macəmkaya ta Yesu Kəriste.

⁷ Mey-maaya-mawiya ha na, Gazlavay ta paya la ɲga wuzda a ndəhay maja maaya aɲga. Ara ta fa gədan aɲga, yah ma tərey ndaw ma ka sləra aɲga ha.

⁸ Yah na, ndaw mecəhe da wuzlah ndəhay ɲga Gazlavay tabiya. Ta ɲgene he cəpa, Gazlavay ta sərfaya dey-ceceh la, ta paya la ɲga wuzey Mey-maaya-mawiya a ndəhay Jəwif hay ba hay. Ya fa wuzdatara mepəsey-mey ma sawa ta fa Kəriste. Cek maaya daa mepəsey-mey a tabiya na, ndaw-magədan a gwa a səra ba.

⁹ Asaya, a paya ɲga wuzda mey mabadakaya zleezle heyey a ndəhay tabiya, amba a səmra cek hay a, a da kam na, kwara. Ara Gazlavay, ndaw ma ləma slam da vad ta slam da hwayak, ma bəda mey a dəga zleezle.

3:5 3.5 Kwa 1.26 **3:6 3.6** mey mabadakaya: 1.9-10; 2.13-14, 18-19; 3.9-11; Rm 16.25; Kwa 1.26-27 **3:8 3.8** ndaw mecəhe: 1Kwr 15.8-10; Gal 1.13-16; Fəl 3.6-8; 1Tm 1.12-16 **3:9 3.9** 1.4

¹⁰ Ama wure keɗe ta wuzdərwa sem ta fa ndəhay daa *mecəmey-ray ɲga ndəhay ɲga Yesu. A wuzdərwa ta fa ata na, amba maslan ɲnga hay da vad ta *bay-ray ata hay a sərmara lenjesl maaya ɲga Gazlavay ma sərey cek hay mekele mekele cəpa.

¹¹ Dəga bəla ta zlar ɲga ləmey daa ba araɲ na, Gazlavay a, a ka kəne maja ta wudəy sem. A ka na, ta fa Yesu Kəriste, Bay aləkwa Mahura.

¹² Anda keɗe, ya gwakwa ɲga ɲgəchakwa asi har ɲga Bay Gazlavay ta mandərzay daa dey daa ba maja aləkwa macəmkaya ta Yesu Kəriste, asaya, maja aləkwa ndəhay ma pamara Yesu ɲga ndaw aləkwa fara fara.

¹³ Maja ɲgene, ya kakwar ambahw, ka da məcmara vaw akwar maja yah ma sərey banay maja akwar ba. Banay yah ma səra keɗe na, sasəkar jak a da kakwar maaya ɲgada fa mey.

Mey da ray mewudəy-vaw ɲga Yesu Kəriste

¹⁴ Ara maja ɲgene, yah ma regedey fa mey ɲga Gazlavay Papan, ɲga dərar dangay maja akwar.

¹⁵ Ara ɲnga ma patar mezəley a səkway hay da gazlavay da vad ta da bəla cəpa, maja ɲnga Papa aləkwa.

¹⁶ Gazlavay aa ta gədaɲ, cek hay tabiya ata dasi har ɲnga. Da ray ɲgene, ya fa dərar dangay amba a vəkwar gədaɲ ta fa Mesəfney ɲnga. Anda keɗe, gədaɲ ɲnga ha ɲga njeɲ daa akwar ma fəna ma fəna.

17 Anja *Køriste nga njeý daa mevel akwar maja anga ndaw akwar fara fara. Asaya, anja akwar nga wudmara Gazlavay, anja akwar nga wudam vaw da wuzlah akwar. Da akwar fa wudam vaw kəne na, ka da hətam gədanj anda wudez masa slaslalay a dərənj daa vөгedf, da daa ba, anda way maləmkaya maaya maaya wurza ha mapakaya ta anğwa.

18 Anda keđe, akwar ta ndəhay nga Gazlavay siya, ka sərmara la, Yesu Køriste na, fa wudndakwar kalah. Ka sərmara la, mewudey-vaw anga ha na, kwakway a daa ba.

19 Ahaw, mewudey-vaw anga ha na, ta fəna lenğesl nga ndaw-magədanj sem. Ama ya fa dərəy danğay amba ka sərmara mewudey-vaw anga ha fara fara cəngə. Anda keđe, ka da hətam menjeý maaya letək anda nga Gazlavay, asaya, Gazlavay a, ray anga, a da njeý ta akwar mandaw mandaw.

20 Yaw, Gazlavay a, a gwa nga vəlndakwar cek ma fəna masa aləkwa maa cəfdafakwar, asaya, a gwa nga kandakwar cek masa ma fəna mewulkey aləkwa, maja anga fa key sləra daa mevel aləkwa ta gədanj anga.

21 Həlmakwa Bay Gazlavay maja ndəhay daa *mecəmey-ray nga ndəhay nga Yesu lenj maja Yesu Køriste he ray anga. Anja ndəhay nga həlmamara Gazlavay nga sərmataw. *Amen.

4

3:17 3.17 Janj 14.23; Ef 5.2; Kwa 1.23; 2.7 **3:18 3.18** Kwa 2.2

3:19 3.19 1.23; 5.2, 25; 2Kwr 5.14; Kwa 2.9-10 **3:20 3.20** Kwa 1.29

Mey da ray mecəmey-ray nga ndəhay nga Yesu

¹ Maja cek hay tabiya masa Gazlavay ma kakwara ta fa *Kəriste na, yah Pawl, ya fa kətkwar, yah ndaw masa daa fərsəne maja Bay aləkwa Mahura. Akwar masa Gazlavay ma zəlkwar nga tərey bəz anga hay na, ya fa kətkwar amba menjey akwar a key anda aa ma wudəy.

² Anda meləvey, daa cek hay masa akwar ma kamara cəpa na, kamara ta meney ray, ta meekwed-mey, ka da cam mevel saw saw ba. Da ndəhay da wuzlah akwar ta kamakwar cek hay maaya ba la na, bəsmara gway, wudam vaw da wuzlah akwar.

³ *Mesəfney nga Gazlavay ta cəmkwar ray la pal. Anda keɗe, kam gədaŋ amba ka njam macəmkaya daa zazay.

⁴ Aləkwa ndəhay daa *mecəmey-ray nga ndəhay nga Yesu na, aləkwa ma tərkwə sem anda vaw pal. Ara Mesəfney nga Gazlavay pal da ray aləkwa. Asaya, aləkwa masa Gazlavay ma zəldakwar na, aləkwa fa səkwakwa cek hay maaya letək masa Gazlavay ma da vəldatara a ndəhay anga hay.

⁵ Bay aləkwa Mahura, anga pal. Mey masa aləkwa ma təbkwa, anga pal. *Baptem, anga pal.

⁶ Gazlavay masa aləkwa ma nakwar ray may, anga pal. Anga Papa aləkwa tabiya, fa wey da

4:1 4.1 3.1 **4:2 4.2 5.2;** Rm 8.13; Gal 6.8; Kwa 3.9; Kwa 3.12-13
4:3 4.3 2.14-16; Kwa 3.14-15 **4:4 4.4 1.23;** 2.18 **4:5 4.5** Jan
 10.16; 1Kwr 8.6; **baptem:** Mt 28.19; Rm 6.3-4

ray aləkwa tabiya, fa key sləra da wuzlah aləkwa tabiya, asaya, aa daa mevel aləkwa tabiya.

⁷ Ama Kəriste ta vəlndakwar gədanj la wal wal nga key sləra anja. A vəldandakwara gədanj a na, ta har cew cew, anda aa ma wudəy nga vəlda sləra a ndaw a, a ndaw a.

⁸ Ara maja ngene, mawuzlalakaya daa dferewel nga Gazlavay, a ləvey:
«Daa masa anja ma təpey a vad na,
Ta handata masa-gəra anja hay
masa aa ma kərzatərwa daa vəram la.
Fa dəba ha, ta', a vəley cek hay mekele mekele a
ndəhay.»

⁹ Yaw, mey ma ləvey: «Anja ma təpey a vad na,» a wudəy nga ləvey kwara? Mey a, a wudəy nga ləvey na, Kəriste ta pawa salay la a bəla fedə dagay.

¹⁰ Kəriste ma pawa salay a bəla heyey na, ara anja saya ma təpey a vad haa a wusey a cakay Bay Gazlavay, amba a wey da ray cek hay kwa daa wura daa wura cəpa.

¹¹ Gədanj masa wal wal a na, ara Kəriste he ta ray anja ma vəltar a ndəhay. A vəltar gədanj a siya hay nga tərey ndəhay meslərey anja hay, siya hay nga tərey ndəhay ma təla mey nga Gazlavay, siya hay may nga wuzey *Mey-maaya-mawiya a ndəhay. Siya hay saya a vəltar gədanj nga tərey anda mecəkwer hay nga ndəhay ma təba mey nga Yesu, aa sərkaadamata ndəhay da ray mey nga Gazlavay.

4:6 4.6 1Kwr 12.6 **4:7 4.7** Rm 12.3, 6; 1Kwr 12.11 **4:8 4.8**
Ps 68.19 **4:9 4.9** Jan 3.13 **4:10 4.10** 1.23 **4:11 4.11** 1Kwr
12.28

¹² Kəriste he a ka kəne na, amba ndəhay a, a jənmata ndəhay ŋga Gazlavay ŋga key sləra ŋgada aŋga. Anda kefe, ndəhay daa mecəmey-ray ŋga ndəhay ŋga Kəriste, a hətam gədaŋ daa mey ŋga Gazlavay la ma fəna ma fəna.

¹³ Ahaw, aləkwa tabiya ya cəmkwa ray la pal daa metəbey-mey pal ŋga Bəzey ŋga Gazlavay, asaya, ya da sərkwə Bəzey a fara fara. Da ray ŋgene, ya da tərkwə ndəhay maŋgaratakaya daa mey ŋga Gazlavay, anda meləvey, ya da tərkwə ndəhay maaya kalah anda Kəriste.

¹⁴ Anda kefe, aləkwa anda bəza hay saba, aləkwa anda hwahwayak masa memed ma həla saw saw saba. Yaw, ndəhay ma mbərzlam fa da gwamara ŋga batamandakwar ta meesərkedey ata, amba ya təbkwa membərzley ata ha ŋgaa zəddandakwar na, daa saba.

¹⁵ Maaya na, ya mbərzlakwa ba, ya wuzkwa mey maaya fara fara da ray Gazlavay, asaya, ya wudkwa vaw da wuzlah aləkwa. Da aləkwa fa kakwa kəne na, ya nakwa la fa mey fa mey haa ya tərkwə anda Kəriste. Aŋga na, *bay-ray ŋga ndəhay daa mecəmey-ray aŋga.

¹⁶ Ara aŋga ma cəmtar ray ŋga ndəhay aŋga hay anda vaw ŋga ndaw pal maləmkaya ta mezəvey hay mekele mekele. Da mezəvey ŋga vaw hay cəpa ata wurwer na, ŋgene vaw tabiya a gəley, a hətəy gədaŋ. Ara kəne may ŋgada ndəhay daa mecəmey-ray ŋga ndəhay ŋga Yesu. Da ndəhay a, fa wudam vaw da wuzlah ata,

asaya, da kwa waawa fa ka slëra an̄ga na, mecəmey-ray a, a hətəy gədan̄ la ma fəna ma fəna.

Pawl a kətata Efez hay n̄ga mbəddamara menjey ata

¹⁷ Ara maja n̄gene, yah, Pawl, ya fa kət̄kwar, asaya, ya fa pakwar len̄gesl ta mezəley n̄ga Bay aləkwa Mahura, ya ləvkwar: ka da n̄jam anda ndəhay ma səm̄ara Gazlavay ba saba. Mewulkey n̄ga ndəhay a na, saw kəne.

¹⁸ Ata daa ləvaṅ. Cek masa Gazlavay ma wudəy na, a gwamara n̄ga cəndamara ba. Ata mələk hay fa mey n̄ga Gazlavay, ta hətam heter mendəvey ba na, daa ba, maja a gəmam n̄ga cəndamara ba səlak, a səm̄ara Gazlavay ba.

¹⁹ Hwaray daa dey ata daa ba, a kam cek anda mevel ata ma wudəy. Fa lam vaw saw da palah mandaw mandaw, fa kam cek hay malamba mekele mekele may.

²⁰ Ama akwar na, aa sərkadamakwar da ray *Kəriste na, anda n̄gene ba.

²¹ Akwar ta cəndamara mey da ray Kəriste la, ba diya? Akwar masa macəmkaya ta Yesu na, taa sərkadamakwara mey fara fara masa Yesu a ma wuzdandakwara la, ba diya?

²² Zleezle na, ka wudam n̄ga key cek hay malamba ma bata ndaw. Cek hay malamba hay a ta nəskwar sem. Yaw, maaya na, ka mbəkdamara menjey akwar masa zleezle n̄gene, anda ndaw ma mbəkda zana magurma.

²³ Mbøðdamara mevel akwar ta lenjesl akwar tabiya.

²⁴ Tøðmara menjey mawiya masa Gazlavay ma ðiykwara anda ndaw ma kəzley zana mawiya fa vaw. Menjey a na, ara menjey maaya ta cøved e, ma mbafar a Gazlavay anda mey nga Gazlavay masa fara fara maa sərkadandakwara.

²⁵ Da ray ñgene, ka da mbərzlam saba. Maaya na, kwa waawa ñгаа guzley mey maaya fara fara a ndaw, maja aləkwa tabiya macəmkaya anda vaw pal.

²⁶ Da mevel fa cakwar na, wam vaw, ka kam mebørey ba. Ka da vərndam daa mecey-mevel haa pas a kəzley ba.

²⁷ Ka da vølmar cøved ñgada bay-malula nga wey da ray akwar ba.

²⁸ Da ndaw fa leley na, anja nga leley saba. Ama maaya na, nga key sløra maaya ta har anga, amba a høtey cek, a jøney ndøhay masa-viya hay may.

²⁹ Ka daa guzlam mey malamba a ndøhay ba. Ama da akwar faa guzlam na, gwaguzlam mey maaya ma jønta ndøhay daa mey nga Gazlavay, mey maaya ma ðiyta ndøhay masa ma jøkfamakwar slømay.

³⁰ Ka da kam cek ma car mevel a *Mesøfney nga Gazlavay ba, maja Mesøfney a, ara anda cek matøhkaya fa danğay akwar nga sørey akwar na, ndøhay nga Gazlavay. Mesøfney a, a da njej

4:23 4.23 Rm 12.2 **4:24 4.24** MC 1.26-27; 2Kwr 5.17; Kwa 3.10

4:25 4.25 4.16; Zak 8.16-17; Kwa 3.8-9 **4:26 4.26** Jak 1.19-20

4:28 4.28 1Tes 4.11 **4:29 4.29** 5.4; Kwa 3.8; 4.6; Jak 3.10

a ray akwar haa ta pas masa Gazlavay ma da ləhdakwar daa cek hay maaya ba da bəla keɗe.

³¹ Mbəkdamara mepəley cəhwal ta mepey mey aa mevel da ray ndaw, leŋ mecey-mevel da ray ndaw. Mbəkdamara mekey baazlam da wuzlah akwar ta mekey mbada fa ndaw. Cek hay malamba tabiya anda keɗe na, ŋgəcham dərən ta ata.

³² Anda keɗe, təram ndəhay maaya, wuɗam vaw, səram dey-ceceh da wuzlah akwar. Mbəkdamatara mebərey ŋga ndəhay da wuzlah akwar anda Gazlavay ma mbəkɗakwara mebərey akwar ta fa Kəriste may.

5

Mey da ray menjey maaya ŋga ndəhay ma təba mey ŋga Yesu

¹ Wure keɗe, akwar na, bəza hay ŋga Gazlavay mawuɗtakaya. Da ray ŋgene, kam cek maaya anda Gazlavay ma ka.

² Daa menjey akwar tabiya na, wuɗam vaw da wuzlah akwar anda *Kəriste ma wuɗndakwar. Ta vəlda ray ŋga la ŋga məcey maja aləkwa, anda gənaw masa ndəhay ma hərmara zleezle ŋga vəley a Gazlavay. Anda keɗe, a mbafar a Gazlavay anda cek mezey maaya.

³ Akwar na, ndəhay ŋga Gazlavay. Da ray ŋgene, da wuzlah akwar na, ŋga maaya ba ŋga ley vaw saw da palah, ta ŋga key cek hay ma

4:30 4.30 1.13-14; Iz 63.10; Rm 8.23; Gal 5.25 **4:32 4.32** Mt 6.14; 18.22-35; Kwa 3.12-13 **5:1 5.1** Mt 5.48; 1Jn 3.1 **5:2 5.2** 3.17-18; 4.2, 15-16; 1Kwr 8.1; 2Kwr 5.14; Gal 6.10; Fəl 2.2; Kwa 2.2; 3.14-15; **a vəlda ray ŋga:** Gal 1.4; Heb 10.5-10

ka hwaray, leŋ nga key dey fa cek nga ndaw. Səkway nga cek hay anda ŋgene na, kwa nga cəney da wuzlah akwar ba səlak.

⁴ Ka daa guzlam mey hay saw ba, asaya, ka daa guzlam mey hay ma ka hwaray ba. Mey hay anda ŋgene na, maaya ba. Maaya na, ka kam suse a Gazlavay.

⁵ Sərmara maaya maaya, ndəhay ma lam vaw saw da palah, ta ndəhay ma kam cek hay ma ka hwaray na, fa da mbəzam aa slam masa Kəriste ta Gazlavay fa wam da vad na, daa ba. Fa da hətam cek hay maaya masa Gazlavay ma da vəldatara a ndəhay anga hay na, daa ba. Asaya, ndəhay ma kam dey fa cek nga ndaw na, fa da mbəzam aa slam aha daa ba may, maja da fa kam dey fa cek nga ndaw na, a ragadamar a cek aha aa slam a nga Gazlavay.

⁶ Ara maja cek hay malamba hay ŋgene, Gazlavay ma da cey mevel a ray ndəhay ma namar ray ba. Da ray ŋgene, ka da vəlmatar cəved a ndəhay nga batamakwar ta mey hay saw ba.

⁷ Kwa ka da cəmam ta ndəhay anda ŋgene ba səlak.

⁸ Zleezle na, akwar daa ləvaŋ. Ama wure keɗe na, akwar daa slam-mewedey maja akwar macəmkaya ta Bay Mahura. Anda keɗe, kam cek anda ndəhay ma njam daa slam-mewedey,

5:3 5.3 Kwa 3.5 **5:3 5.3-5** Gal 5.19-21 **5:4 5.4** 4.29; Kwa 3.8 **5:5 5.5** Rm 5.17 **5:6 5.6** Rm 1.18; Ef 2.3; Kwa 2.4, 8; 3.6 **5:8 5.8** ləvaŋ: 2.3, 11-12; 4.17-18, 22; Kwa 3.7; Tit 3.3; **slam-mewedey:** Jan 8.12; Kwa 1.13; 1Pi 2.9

⁹ maja ndəhay ma njam daa slam-mewedey na, a kam cek maaya, a kam cek ta cəved e, a mbərzlam ba.

¹⁰ Səpam nga key cek masa ma mbafar a Gazlavay.

¹¹ Ka da kam cek hay malamba anda ndəhay daa ləvaŋ ma kamara ba. Cek hay masa ata ma kamara ŋgene na, ara cek nga tede. Ama wuzdamara cek masa ata ma kamara maaya ba ha ŋgene.

¹² Fara fara, kwa ŋgaa guzley da ray cek hay masa ata ma kamara ta mebey a ŋgene na, a key hwaray.

¹³ Ama da cek malamba maɓadakaya ta wuzwa sem a palah na, ndəhay a hətmar maaya maaya, a səmra ara cek malamba.

¹⁴ Anda meləvey, daa slam-mewedey na, cek malamba a hətey maaya maaya. Ara maja ŋgene mey daha fa ləvey:

«Kah, ndaw masa manakaya,
Sləkdey daa ɗar.

Kah, ndaw masa maməckaya,
Sləkɗawa daa meməcey a.

Amba mewedey nga Kəriste a sawa a ray akah.»

¹⁵ Da ray ŋgene, wam vaw fa menjey akwar, ka da kam cek hay anda ndəhay manjar lengeŋ hay ba. Ama kam cek hay anda ndəhay ta lengeŋ maaya.

16 Da akwar ma hɔtam har la ɗga key cek maaya na, kamara, maja wure keɗe na, ndɔhay fa kam cek hay malamba kalah.

17 Anda keɗe, ka da rɔzlam ba, ama sɔpam na, ɗga sɔrey cek maaya masa Bay Mahura ma wuɗey fa akwar.

18 Ka da sam wuzam ɗga wey ba, maja wuzam na, a nɔsa menjey ɗga ndaw. Ama vɔlmar cɔved a *Mesɔfney ɗga Gazlavay ɗga njej daa mevel akwar mandaw mandaw.

19 Zlam walay da wuzlah akwar ta meesɔmey, walay hay masa Mesɔfney ɗga Gazlavay ma vɔlkwar gɔɗaɗ ɗga zla. Zlam walay hay daa *Pɔsam hay *, ta walay hay mekele ma hɔlma Bay Gazlavay. Zlamar walay hay ɗga hɔlma Bay akwar Mahura, hɔlmamara ta mevel akwar cɔpa.

20 Kamar suse a Gazlavay Papa alɔkwa maja cek hay tabiya. Kamar suse mandaw mandaw ta mezɔley ɗga Bay alɔkwa Mahura Yesu Kɔriste.

Mey da ray menjey ɗga ɗgwas ta zel e

21 Akwar ndɔhay masa ma namar ray a *Kɔriste na, nam ray a ndaw a, a ndaw a da wuzlah akwar may.

5:16 5.16 Kwa 4.5 **5:17 5.17** 1.17; Rm 12.2 **5:18 5.18** MM 23.31-35; Rm 13.13 * **5:19 5.19** Pɔsam hay na, ara walay hay masa Bay Davit ta ndɔhay Jɔwif hay mekele ma zlamata zleezle. Walay hay a na, mawuzlalatakaya daa mey ɗga Gazlavay ɗga *Mejɔwey-mey Magurma. Ta mey Pɔlta a zɔlmara «Jabuura».

5:19 5.19-20 Ps 33.2-3; Kwa 3.16-17; Heb 13.15 **5:21 5.21** 1Pi 5.5 **5:21 5.21-6.9** Kwa 3.18-4.1; 1Pi 2.18-3.7; 1Tm 2.1-13; Tit 2.1-10; 1Jn 2.12-17

²² Akwar ηgusay, namatar ray a zel akwar hay, ara cek ma mbafar a Bay Mahura.

²³ Maja zel na, ara *bay-ray ηga ηgwas, anda Kēriste ma key bay-ray ηga ndəhay daa mecəmey-ray aηga. Mecəmey-ray ηga ndəhay aηga hay a na, ara anda vaw aηga. Ara Kēriste he ma ləhdata ndəhay daa mecəmey-ray aηga ha daa mebərey.

²⁴ Da ray ηgene, anda ndəhay daa mecəmey-ray ηga Kēriste ma namar ray a Kēriste he na, akwar ηgusay may, namatar ray a zel akwar hay daa cek hay tabiya masa akwar ma kamara.

²⁵ Akwar zel hay may, wudmata ηgwas akwar hay anda Kēriste ma wudta ndəhay daa mecəmey-ray aηga. Ta vəlda ray aηga la ηga məcey maja ata,

²⁶ amba a tərdata ηga ndəhay maaya manjar mebərey ta fa yam ηga *baptem, asaya, ta fa mey aηga.

²⁷ Kēriste a vəlda ray aηga na, amba a təbta ndəhay daa mecəmey-ray aηga anda ndaw ma ley kwakwa membey, asaya, amba ndəhay aηga hay a, a tərām ndəhay mapərtakaya, kwa mebərey ta cek maaya ba fa ata na, daa ba.

²⁸ Ara anda keɗe, zel may, si a wudfa ηgwas aηga anda aηga ma wudfa ray aηga. Ndaw ma wudfa ηgwas aηga na, a key ηgene, a wudey ray aηga.

5:22 5.22 1Kwr 14.34-35 **5:22 5.22-24** Kwa 3.18; Tit 2.5; 1Pi 3.1 **5:23 5.23** 1.22; 1Kwr 11.3 **5:25 5.25** 3.19 **5:25 5.25-28** 1.23; Kwa 3.19; 1Pi 3.7 **5:26 5.26** baptem: Rm 6.3-4; Tit 3.5; Heb 10.22 **5:27 5.27** 1.4; 2Kwr 11.2; Fəl 1.10; Kwa 1.22

²⁹ Fara fara, ndaw ma wudfa ray anğa ba na, daa ba. Ama kwa waawa fa zomey cek, fa wey vaw ta ray anğa anda Kəriste ma wey vaw ta ndəhay daa mecəmey-ray anğa may.

³⁰ Kaa aləkwa na, ndəhay daa mecəmey-ray anğa Kəriste, ba diya?

³¹ Mawuzlalakaya daa mey anğa Gazlavay, a ləvey: «Maja nge, ndaw-mezəle a mbəkda papaha ta mamaha, amba a cəmam ta nğwas anğa, a təram anda ndaw pal.»

³² Mey a kedə na, mey mahura mabadakaya da hwaɗ a daha. Yah na, ya fa ləvkwar, mey a kedə aa guzley da ray Kəriste ta ndəhay daa mecəmey-ray anğa.

³³ Mey a faa guzley may nğada akwar. Anja kwa waawa da wuzlah akwar anğa wudfa nğwas anğa anda anğa ma wudfa ray anğa. Akwar nğusay may, kwa waawa anğa nar ray a zel e.

6

Menjey nğa bəza hay da cakay papa ata hay ta mama ata hay na, kwara?

¹ Akwar bəza hay, akwar macəmkaya ta Bay Mahura, cənmatar mey a papakw akwar hay ta mamakw akwar hay maja ara cek maaya.

²⁻³ *Mewey nğa Gazlavay daha fa ləvey: «Natar ray nğada ata papakw ta mamakw.» Mewey a kedə na, ara mewey ngeeme daa masa Gazlavay ma ləvey a da kandakwar cek maaya, da aləkwa ta səpkwa mey a la. Cek maaya ha

na, ara «Ka hətam zazay la, ka njam la ga da bəla kefe.»

⁴ Akwar papaŋ hay may, ka da kam cek ŋga catar mevel a bəz akwar hay ba. Ama, kətmata, sasərkadamata maaya maaya anda Bay Mahura ma wudey.

Mey da ray beke hay ta ndəhay ma wamata

⁵ Akwar beke hay, namatar ray a bay akwar hay da bəla kefe ta mevel pal, cənmatar mey. Namatar ray anda akwar ma namar ray a *Kəriste.

⁶ Ka da cənmatar mey na, fa dey ata daada amba aa həmdamakwar ba, ama kam cek masa Gazlavay ma wudey ta gədaŋ akwar cəpa, maja akwar na, anda beke hay ŋga Kəriste.

⁷ Kamatar sləra a bay akwar hay ta meesəmey anda ka kamara na, ŋgada Bay Mahura, ba na, ŋgada ndaw-magədaŋ ba.

⁸ Sərmara, da ndaw ta key sləra maaya la kwa aŋga beke, kwa aŋga beke ba na, Bay Mahura a pəlra mawurbay aŋga la.

⁹ Yaw, akwar ndəhay ma wamata beke hay may, kərzamata beke akwar hay ta cəved e, ka da həlmatar dey ba. Si ka sərmara na, akwar ta beke akwar hay a na, Bay akwar pal da gazlavay da vad daha. Aŋga na, a weley ndaw ta weley ba, a nəkta ndəhay tabiya letək fa mey aŋga.

Ma da key vərəm ta bay-malula na, ta me?

6:2-3 6.2-3 Mew 5.16 **6:4 6.4** Kwa 3.21 **6:5 6.5-8** Kwa 3.22-25;
 1Tm 6.1-2; Tit 2.9-10; 1Pi 2.18-21 **6:6 6.6** 1Kwr 7.22 **6:8 6.8**
 2Kwr 5.10; Kwa 3.24-25 **6:9 6.9** Kwa 3.25; 4.1; Jak 2.1

¹⁰ Ehe, mey adaw mekele ngada akwar: Njam macəmkaya ta Bay Mahura amba ka hətam gədanj anga masa mahura.

¹¹ Jəwmata vaw akwar hay ta cek hay ma ka vərəm masa Gazlavay ma vəldakwara. Anda keđe, ta pas masa bay-malula fa da batakwar na, ka hətam gədanj la nga fəna wewer anga.

¹² Ya da kakwa vərəm na, ta ndəhay magədanj ba, ama ta *bay-ray hay nga mesəfney maaya ba hay masa ta gədanj ga, ma wam da ray cek hay daa ləvanj da bəla keđe. Asaya, ya da kakwa vərəm na, ta mesəfney maaya ba hay ma wam da vad.

¹³ Ara maja ngene, lamata cek hay tabiya ma ka vərəm masa Gazlavay ma vəldakwara heyey. Anda keđe, da masa pas nga vərəm ta wuswa cay na, ka jaram la fa masa-gəra akwar hay. Ka da kam vərəm ta masa-gəra akwar hay a haa mendəvey a. Fa dəba ha, ka da lacam deŋ e! akwar bay-gula hay.

¹⁴ Jəwmata vaw akwar hay maaya maaya, anda meləvey, njam ta mey masa fara fara ta membərzley da hwaď a daa ba. Mey masa fara fara ha na, ara anda senter masa ndaw-sewje ma jəwda vaw amba a key vərəm ta gəra ba. Kam cek ta cəved e. Mekey cek ta cəved e na, ara anda zana nga bərey masa sewje ma bərdə fa dadak nga key vərəm.

¹⁵ Diyam vaw nga wuzey *Mey-maaya-mawiya ma handawa zazay. Mediyey vaw a na, ara anda

6:10 6.10 Jan 15.5; 1Kwr 16.13 **6:11 6.11** Jak 4.7 **6:11 6.11-17**
 2Kwr 10.4; 1Tes 5.8; Iz 59.17 **6:12 6.12** 1.21; 2.2; 1Pi 5.8-9 **6:13**
6.13 Rm 13.12 **6:14 6.14** Iz 11.5

tarak masa sewje ma pa a salay amba a jerey.

¹⁶ Daa cek hay masa akwar ma kamata cəpa na, pamara Yesu nga ndaw akwar fara fara mandaw mandaw. Ka kamara kəne na, ara anda mbaray masa sewje ma kərza a har. Ta mbaray a, ka da jaram fa ləvat hay tabiya ta awaw da mey a masa bay-malula ma da məlkwar ta anga.

¹⁷ Sərmara na, Gazlavay ta ləhdakwar cay. Meləhey a ngene na, ara anda jikwew nga bərey masa sewje ma pa a ray nga key vəram. Mey nga Gazlavay masa Mesəfney anga ma vəldakwara na, kərzamara maaya maaya, ara anda dəlaw nga key vəram ta bay-malula.

¹⁸ Dəram dangay mandaw mandaw ta gədan masa *Mesəfney nga Gazlavay ma vəldakwara. Cacəfdamara Gazlavay nga jənkwar kwa daa meeme tabiya. Daa medərey-dangay akwar na, ka da gəram ba, mayad a da kakwar ba. Dəram dangay maja ndəhay tabiya ma təbmara mey nga Gazlavay.

¹⁹ Daa medərey-dangay akwar a na, sərfadamaya may, amba Gazlavay a balaya mey hay maaya maaya ta pas masa yah ma daa guzley fa mey nga ndəhay. Cacəfdamara Gazlavay amba yaa sərkadatarə mey mabadakaya daa Mey-maaya-mawiya a ndəhay ta mandərzay daa dey daa ba.

²⁰ Yesu *Kəriste ta walaya la nga key ndaw anga meslərey, amba ya wuzda Mey-maaya-mawiya ha. Ara maja ngene, ata ma kəzlamaya

aa fərsəne. Da ray ngene, dəram dangay maja yah, amba ya wuzda Mey-maaya-mawiya fa mey nga ndəhay ta cəved e, anda Gazlavay ma wudfey.

Mey nga madagway-dakw

²¹ Ya fa wudfey amba ka səmra menjey adaw fedfe. Da ray ngene, Tisik masa mələma aləkwa daa cəved nga *Kəriste, a kadakwara sləra adaw ta menjey adaw ha la. Anğa ndaw masa yah ma wuda kalah, anğa fa key sləra nga Bay Mahura ta mevel pal.

²² Maja ngene, ya fa slərdakwara Tisik e amba ka səmra menjey ala fedfe, asaya, amba a vəkwar gədan.

²³ Akwar mələma adaw hay, anja Gazlavay Papa aləkwa ta Bay aləkwa Mahura Yesu Kəriste nga njadamakwar daa zazay, nga handamawa mewudfey-vaw a wuzlah akwar, asaya, nga njadamakwar daa metəbey-mey.

²⁴ Anja maaya nga Gazlavay nga njeý ta ndəhay tabiya ma wudmara Bay aləkwa Mahura Yesu Kəriste ta mewudfey-vaw masa fara fara mendəvey ba.

6:20 6.20 3.2; 2Kwr 5.20; Kwa 4.4 **6:21 6.21-22** Tisik: SNM 20.4; Kwa 4.7-8; 2Tm 4.12; Tit 3.12 **6:23 6.23** zazay, mewudfey-vaw: 2Kwr 13.11 **6:24 6.24** Gal 6.18; 1Pi 1.8

xxx

Mofu-Gudur
The New Testament in the Mofu-Gudur language of
Cameroon: Mejəwey-mey Mawiya
Le Nouveau Testament en langue Mofu-Gudur
(Cameroun)

copyright © 2007 Wycliffe Bible Translators, Inc.

Language: Mofu-Gudur

Contributor: Aramaic Bible Translation, Inc.

All rights reserved.

2025-05-14

PDF generated using Haiola and XeLaTeX on 14 May 2025 from source
files dated 14 May 2025

2b021919-36cf-59da-a35f-10c5e5548811